

**Innuttaasut peqqissutsikkut sullinneqarsinnaanissaat anguniarlugu cubameersuni peqqinnissaqarfimmi sulisunik sulilersitsiniaanissamut suliniut unitsinneqarallarsimasoq aallarnisaqqinnissaa anguniarlugu Naalackersuisut peqquneqarnissaanik Inatsisartut aalajangiiffigisassaattut siunnersuut. Aallarnisaanissaq 2022 naatinnagu pissaaq.**

(Inatsisartunut Ilaasortaq Anna Wangenheim, Demokraatit)

**Akissuteqaat**

(Peqqinnissamut Naalackersuisoq)

**Siullermeerneqarnera**

Naalackersuisut Anna Wangenheim Demokraatineersoq Cubameersuni peqqinnissaqarfimmi sulisunik sulilersitsiniaanissamut suliniutip aallartinnissaanut Naalackersuisut peqquneqarnissaanik Inatsisartut aalajangiiffigisassaattut siunnersuummik saqqummiussaartoq qutsavigaat.

Peqqinnissaqarfik atorfiit inuttalerniarneqartarnerinut sulisunillu sulisorinniinnartarnermut tunngatillugu maannakkut immikkut ilungersunartumik inissisimanagera qularutissaanngilaq. Peqqinnissaqarfiup peqqinnissamut immikkoortortaqaqfinnut tamanut peqqissutsitigut ilisimasalinnik piginnaasalinnik sulisussarsiortarnermut isumalluuterpassuit atortarpei. Tamatuma saniatigut sapinngisamik sivisuumik atorfeqartarnissap qulakkeernissaa isiginiarneqartupilussuuvoq, naak tamanna imaalitsiaannarneqarsinnaanngikkaluartoq Nunani avannarlerni nunarsuarmilu peqqissutsimut tunngasutigut piginnaasallit annertuumik amigaatigineqarmata.

Sulisunik peqqissutsimut tunngasutigut ilisimasalinnik sulisussarsiortarnermut tunngatillugu sulisunik Peqqinnissaqarfimmut inuiaqatigiillu sinnerannut ilaalersitsisinnaanissap isiginiarnissaa pingaaruteqarluinnarpoq. Naalackersuisuni ilisimalluinnarparput paarlattaasartunik annertuumik atuineq piffissamilu sivikitsuinnarmi atorfeqartitsisarneq Peqqinnissaqarfimmi sulisunut aalajangersimasunut artukkiisartut. Taamaattumik Peqqinnissaqarfimmi sulisut aqutsisullu qanimut suleqatigalugit aaqqissuussinerit nutaat ineriartortinneqassapput. Taamaattumik Naalackersuisut aaqqiissutissat periarfissaasut, tassunga ilanngullugu sulisunik tuluttut oqalussinnaasunik nunani avannarlerniinngaanneersuniunngitsoq atorfinitsitsinissamut periarfissat pillugit Peqqinnissaqarfik oqaloqatigineqarneranik aallartitsisimavoq. Eqqartuinnermi paasineqarsimavoq ullumikkut sulisunik tuluttut oqalussinnaasunik ilanngutitsinissamik annertuumik unammilligassaartoq aammalu katsorsaanermi innuttaasunillu oqaloqateqarnermi kukkusoqarsinnaaneranut paatsoortoqarsinnaaneranullu aarlerinarnerulersitsisinnaasoq. Taamaattumik Peqqinnissaqarfik ullumikkumit annertunerusumik nunanit allanit sulisunik ilanngutitsinissamut piareernissaanut pissutsit arlallit inissinneqaqqaartariaqarput.

Suliniut aalajangiiffigisassatut siunnersuummi innersuussutigineqartoq avataanit siunnersuisarfimmik suleqateqarnikkut peqqissutsimut suliassaqarfimmut peqqissaasunik sulisussarsiortarnermut pingaarnertut tunngassuteqarpoq. Siunnersuinnermik suliffeqarfik ilaatigut Cubami oqartussanut attaveqarnermik ikiuuttussaasimavoq, tassuunakkullu peqqissutsimut tunngasutigut sulisunik sulisussarsiortarnermut isumaqatigiissut ingerlanneqartussaasimalluni. Suliniut

aallartinneqarnikuunngisaannarsimavoq peqqissutsimut tunngasutigut sulisunik Cubameersuniinnaangitsoq siammasinnerusumilli isiginiagaqartoqarnissaa kissaatigineqarsimammat. Taamatuttaaq Naalackersuisut peqqissutsimut tunngasutigut sulisunik Cubameersunik, nunanut allanut suliarortinneqartartunik aqqissuussineq inuit pisinnaatitaaffii pillugit suliniaqatigiiffinniit arlaqartunit isornartorsiorneqarsimanera maluginiarsimavaat<sup>1</sup>. Human Rights Watchip ilaatigut erseqqissarpaa, peqqissutsimut tunngasutigut nunani allani sulisut inatsisinit malittarisassaniillu inuttut kiffaanngissutsimut killilersuisunit aammalu sulisunut, assersuutigalugu nunani allani sulinerminnik taamaatiterusuttunut oqartussat pineqaatissiinissaannut periarfissaqartitsisunit naqisimaneqarput<sup>2</sup>.

Siulianiittut tunngavigalugit Naalackersuisut Cubami sulisussarsiornermik suliniutip aallartinneqaqqinnissaa kissaatiginnigilaat, Cubami oqartussanik isumaqatigiissutaasunut peqqissutsimullu tunngasutigut sulisunut pineqartunut atugassarititaasunut tunngatillugu erseqqinnigitsut amerlavallaarmata. Taamaattumik siunnersuutip itigartitsissutiginnissaa inassutigineqarpoq.

Naalackersuisulli siunnersuuteqartoq isumaqatigaat nunatsinni innuttaasut peqqinnissakkut sullinneqartariaqarnerat anguniarlugu aalajangersimasumik peqqinnissaqarfimmik aqqissuusseqqittoqartariaqartoq. Naalackersuisut aamma isumaqatigaat Nunanit avannarlernit peqqinnissakkut sullissisussanik atorfinitsitsineq naammangitsoq taamaattorli nunanit allanit siammasinnerusumik suleqateqartoqartariaqartoq.

Tamatumalu kingunerisaanik Naalackersuisut imaattunik allannguutissatut siunnersuuteqarput:

*Kalaallit Nunaanni Peqqinnissaqarfimmi nunanit allanit peqqinnissakkut sulisorisanik sulisussarsior tarsinnaanermut periarfissat aamma aporfiit misissorneqarnissaat pillugit Naalackersuisut peqquneqarnissaanik Inatsisartut aalajangiiffigisassaattut siunnersuut.*

---

<sup>1</sup> Human Rights Foundation [HUMAN-TRAFFICKING-IN-CUBA-MEDICAL-MISSIONS-REPORT\\_FINAL.pdf \(hrf.org\)](https://hrf.org/wp-content/uploads/2022/08/HUMAN-TRAFFICKING-IN-CUBA-MEDICAL-MISSIONS-REPORT_FINAL.pdf)  
[https://hrf.org/wp-content/uploads/2022/08/HUMAN-TRAFFICKING-IN-CUBA-MEDICAL-MISSIONS-REPORT\\_FINAL.pdf?mc\\_cid=37395ca7e1&mc\\_eid=4e3e4ed79d](https://hrf.org/wp-content/uploads/2022/08/HUMAN-TRAFFICKING-IN-CUBA-MEDICAL-MISSIONS-REPORT_FINAL.pdf?mc_cid=37395ca7e1&mc_eid=4e3e4ed79d)

<sup>2</sup> Human Rights Watch. <https://www.hrw.org/news/2020/07/23/cuba-repressive-rules-doctors-working-abroad>